

Pepa Tupulaga Talavou EFKS Kuiniselani

Fono Tele i Malua 2011

Manatu Autu: “Le Ali’i e, ia e faatumuina lau Ekalesia i lou Agaga Paia”

Matua: Kalatia 5: 22 – 23

“A o le fua o le Agaga o le alofa, o le olioli, o le filemu, o le onosa’i. o le mataalofa, o le agalelei, o le faamaoni, o le agamalu, ma le amio mama; e le faatulafonoina mea faapena”

FAATOMUAGA

I le ava tele ma le faaaloalo, e faatalofa atu ai i le paia ma le mamalu o le Fono Tele, le afio o lau Afioga i le Taitaifono, le Sui Taitaifono, lau Susuga i le Failautusi Aoa, le Teutupe, le Komiti o le Au Toeaina, tama o le ekalesia, le nofo a komiti, le au faigaluega paia a le Atua, faapea sui usufono mamalu o le Fono Tele 2011. Faamalo le soifua i le alofa ma le agalelei o le Atua.

E le fesiligia le silafia o le Fono Tele i le taua o le Agaga Paia i lo tatou ola fa’aleagaga, aua ua aofia potopoto le au faigaluega paia a le Atua; o e ua faatamaoigaina i le malamalama o le Tusi Paia, aemaise foi o lo outou soifua galulue ai i tausaga e tele i le galuega faafaifeau i Samoa ma le lalolagi.

Afai o le Agaga Paia o le ala tonu na amataina ai le Ekalesia i le Aso Penetekoso (Galuega 2:4), ua matua taua tele ai le manatu autu o le Fono Tele, “Le Alii e, ia e fa’atumuina le Ekalesia i Lou Agaga Paia”. O se olega lea i le Atua ina ia afio ifo lona Agaga Paia, ma fa’atumuina le Ekalesia atoa. O se manatu ua faailoa ai le faanaunau atu o le Ekalesia i le Agaga Paia, ma fua mai ini fua lelei o le Agaga. Ina ia manuia ai le atiina’e o le Ekalesia ma le ola faaleagaga o ona tagata e aofia ai ma tupulaga.

E talitonu le taofi o tupulaga o se vaega taua i totonu o le Ekalesia, o le ala lea ua matou saunia ai lenei pepa e fa’asoa atu ai manatu ma lagona o tupulaga o le Matagaluega a Kuiniselani. E uiga i le taua o le ola i le taitaiga a le Agaga Paia, ma ia mafai ona avea tupulaga ma ni auauna faatauvaa mo le lumanai o le Ekalesia. I lenei foi pepa, ua molimauina ai lo matou talitonuina pea o le galuega a le Agaga Paia i o matou olaga faaleagaga. Ae le gata i lea, o mea e ono afaina ai le tupulaga e pei ona vaaia i totonu o vaega e tolu o le olaga i aso fai soo:

- Olaga faaleagaga - Spiritual Life
- O le soifuaga o aso uma- Social life
- Olaga fa’a-Samoa - Samoan culture and life

MANATU O LE PEPA

Ua fa’atulagaina mataupu o lenei pepa i ni vaega se tolu:

1. O le Agaga Paia
2. Galueaina o tupulaga talavou e le Agaga Paia
3. Mafaufauga fa’atupu manatu mo tupulaga talavou ma le Ekalesia

1. O le Agaga Paia

1.1. O le Mana poo le Malosi o le Atua mo le Ekalesia. E le tau faanamoina le Agaga Paia, aua ua silafia lava e le paia o le Fono Tele le Agaga Paia, o le Peresona lona tolu lea o le Atua e pei ona talitonuina e le au Kerisiano – le Atua Tolu Tasi Paia; le Atua le Tama (Ioane 6:27; Efeso 4:6), le Atua le Alo (Eperu 1:8) ma le Atua le Agaga Paia (Galuega 5:3,4). E ui lava ina tolu peresona o le Atua, a o le Atua e tasi lava ia. Na fetalai Iesu i ona so'o i Kalilaia ae lei afio ae i le lagi ina ia latou talai le tala lelei ma papatiso tagata uma i le suafa o le Tama, le Atalii ma le Agaga Paia (Mataio 28:19). Ua molimauina e Mareko, sa galulue faatasi le Alii (Aaga Paia) ma i latou (le au soo) i la latou galuega talai (Mareko 16:20). O lo o taua foi e Luka ma Ioane, na fetalai Iesu, o le Agaga Paia, na folafolaina e le Tama lona auina ifo (Luka 24:49) o le fesoasoani i ona soo i le molimauina o ia (Ioane 15:26).

Ua atagia i ia molimau, o le Agaga Paia o le mana poo le malosi lea o le Atua, e mafai ai ona galueaina le ola faaleagaga o tagata o le Ekalesia e galulue ai. Na ia auina ifo lona Agaga Paia i soo o Iesu, ma le au aposetolo o le uluai Ekalesia e taitaiina ai le galuega talai ma faaopoopoina ai tagata o le Ekalesia, e pei ona iai i le Aso Penetekoso (Galuega 2). Ua manino mai ai, o le Agaga Paia e mafai ai e le Ekalesia ona faia lana galuega, pe a faatumulia tagata uma e le mana lea o le Atua, ma talia ma mulimulitai i lana taitaiga. I la tatou matua (Kalatia 5:22-23), ua manino mai ai, e maua e tagata o le Ekalesia ia fua o le Agaga poo amio lelei uma e pei ona taua, pe a taliina ma mulimulitai i le taitaiga a le Agaga Paia. O lona uiga, o amio lelei uma e le mafua ona maua e tagata, ona o le tausia o le tulafono e pei ona faia e le au faresaio, ae ona o le usitai i le taitaiga a le Agaga Paia, o Iesu lava lea, e faafoeina le ola o le tagata. A faatumuina la le Ekalesia e le Agaga Paia, ma savavali tagata i lana taitaiga, o se Ekalesia faamanuiaina, i lona atiinaeina i le tulaga i le tino ma le agaga e aofia ai ma lana galuega talai.

1.2. O le Uo (Friendship) – Talitonuga o Tulupaga Kuiniselani.

I talitonuga o tupulaga talavou i le Agaga Paia, ua maua mai i so latou iloa masani (Experience) e ala i mea eseese e tutupu i o latou olaga. i la matou suesuega sa faia i le Matagaluega, ua molimauina ai e nisi o tupulaga, le mafutaina o i latou e le Agaga Paia, i taimi ua taua i lalo.

- Taimi faigata o le olaga – o taimi ia o faaosoosoga a le tiapolo
- Taimi o faigalotu faapitoa mo tupulaga
- Taimi pe a maea ona faatino se faamoemoe (ft. pesepesega, faafiafiaga, siva faale-agaga, taaloga)
- Taimi faigata o suega i le aoga
- Taimi paganoa o le olaga
- Taimi o mafutaga i aiga (ft. faigalotu i afiafi)

O lo latou lagonaina o le taua o le mafutaga ma le Agaga Paia, ua latou faapea mai ai, o le Agaga Paia o sa latou uo. O lea lagona e mafua ona o le mafana o le mafutaga ma le Agaga Paia, ma lana galuega musumusu, taitai, leoleo, faamafanafana, ma faamalosi.

2. GALUEA'INA O TUPULAGA TALAVOU E LE AGAGA PAIA

Ua manatu nisi o tupulaga, o le tagata ua galueaina lona ola e le Agaga Paia, o le Kerisiano lea ua talitonu i le Atua ma taliaina Iesu i le faatuatua, e mafua ai ona ia faia amio lelei, aua o fua ia o le Agaga Paia.

O le galueaina e le Agaga Paia o olaga o tupulaga talavou, e amata mai lea i lona siosiomaga. E pei o matua i aiga, ekalesia, faigauo i totonu o aoga, galuega ma fafo atu, aemaise foi o fesootaiga faatekenolosi (technology) e pei o le upega faatafa'ilagi (social media/internet). O se tasi foi o vaega taua o olaga o tupulaga e faailoa ai galuega a le Agaga Paia, o le olaga faa-Samoa.

E faafetaia galuega a matua ma faifeau, i le faatonuina ma fautuaina o fanau ia ola i le taitaiga a le Agaga Paia. O le faafaileleina lea o lo latou olaga faaleagaga, mai lava a o laiti e oo ina matutua. E iloa le tupulaga talavou ua galueaina e le Agaga Paia, i lana amio, i ona foliga ma lana gagana. E le faailoga tagata, e amio lelei, e ola tausafia, e loto alofa, e loto maulalo ma le faaaloalo.

E taua i le toatele o tupulaga le galuega faifai pea a le Agaga Paia i o latou olaga, ae ua molimau nisi, e i ai ni faafitauli ua aafia ai le lagonaina o le musumusuga a le Agaga Paia, e pei ona faaalua mai i vaega e tolu ua taua i lalo.

2.1. O le olaga faaleagaga.

O le tagata ua ola i le faaleagaga, ua talitonu ma talia le Agaga Paia i le faatuatua, ma ua savali i le taitaiga a le Agaga Paia, e pei ona taua e Paulo i le tusi a Kalatia: "A o le fua o le agaga o le alofa, o le olioli, o le filemu, o le onosai, o le mataaalofa, o le agalelei, o le faamaoni, o le agamalu, ma le amio mama; e le faatulafonoina mea faapena" (Kalatia 5:22 & 23)

O le olaga faaleagaga o tupulaga e amata mai i totonu o le aiga; e a'oa'o e matua le fanau e faalogo ma usitai. O lenei aoaoga, e fautuaina ai le mafaufau o le tama ma le teine, ia faalogo ma usitai i faatonuga a faifeau, nuu ma Ekalesia. O le ola faaleagaga o tupulaga, e faamalosi i le auai atu i mafutaga i totonu o le lotu, e iai le A'oga Aso Sa, Au Talavou, A'oga Faifeau, Aufaipese, Au Leoleo ma le Au Taumafai.

E toatele tupulaga e lagolagoina nei mafutaga, ae peitai e iai se vaega o le au talavou ua molimau i ni o latou vaivaiga e aafia ai lo latou ola tapuai.

i. Le atoatoa le malamalama i le gagana Samoa. E iai se vaega o tupulaga ua tautino mai e vaivai lo latou tomai i le itu o le Gagana. E faigata ona malamalama tupulaga i le gagana, aemaise i le lauga a le faifeau i isi taimi ona o le maotua o le gagana faaogaina.

ii. Le atoatoa le malamalama i le tapuaiga. Ua manatu nisi tupulaga ua iva tele le tapuaiga a le EFKS. E tupu nei manatu ona o le le atoatoa o le malamalama i le uiga ma le faasologa o le tapuaiga. Ua mafuta atu foi i nisi tapuaiga e pei o le Assembly of God ma le Lotu Aso Fitu, ma ua molimau i latou e sili atu ia tapuaiga nai lo le EFKS.

O le tele lava o le faafitauli e feagai ma tupulaga i totonu o le Ekalesia e mafua ona o le le atoatoa o le malamalama. E talitonu lava foi oloo faaauau pea galuega a matua ma

faifeau e faasino ma faufautua e pei ona taua i luga, ae faamoemoe lava i le Agaga Paia o le Atua na te taitai pea olaga o tupulaga ia aua nei fano.

2.2. O le Soifuaga o aso uma

O le olaga o tupulaga, e aofia ai mafutaga i totonu o aiga, aoga ma fale faigaluega. O lenei soifuaga e fofoa mai lea i ana lava filifiliga, e ese lea ma le olaga faaleagaga, aua o le mea alofa lea mai le Atua, ua saunia mo i tatou. E faasoa atu ni mafaufauga e uiga i le aoga o le soifuaga i aso uma, e tau atiina'eina ai le ola faaleagaga o tupulaga.

O le vaega muamua, o manatu o nisi tupulaga ua maua mai i suesuega, e aafia ai lo latou malamalamaaga i le EFKS mai le soifuaga i totonu o aiga, faleaoga, ofisa faigaluega ma faigauo i fafo atu. O nei tulaga uma, ua aafia ai tupulaga i tu ma aga mai fafo, e pei o le ola tutoatasi (independence). O se olaga e le mafuta ai ma matua, aiga ma le faifeau, ma tau mamao ma fautuaga lelei mo le ola faaleagaga.

Ua manatu nisi, o le auaunaga i le Ekalesia e afua mai i le usitai i matua, ae le o le latou lava loto fuatiaifo. Ua matou talitonu, a vaai loloto i mafaufauga o i tua o lenei manatu, ua vaivai le faavae o lo latou faatuatua, o lea vaivaiga e faafaigofie ai ona tosina o latou mafaufau, i tapuaiga eseese ma manatu eseese. E ala na o le usitai i matua ae le o malamalama.

O se isi vaaiga fou molimauina i nei ona po, o le faaaogaina o le fesootaiga i upega tafa'ilagi (internet/website) e fesootai ai tupulaga ma a latou aiga ma uo, i soo se vaipanoa o le lalolagi. O lenei ua iloa le lelei ma le saosasoa o le poto ma le atamai faatekenolosi i ona po nei (new technology, internet, social media, Facebook & Twitter).

I lona itu lelei, ua avea nei fesootaiga ma auala e faaleoina ai manatu o alo ma fanau i soo se mea oloo teu i le loto ma le mafaufau, e ono fefaasoai ai e faamalosi ma faamafanafana pe a oo mai ni faafitauli, ma e maua ai ma le fesoasoani. E aoga foi i le ola faaleagaga o le au talavou aemaise mo le sailiga o ni faamatalaga (information) mo tusitusiga faaleagaga e aoga mo A'oga Aso Sa, tala a tamaiti, ma le tapenaina foi mo sauniga mo le Au Taumafai.

O se vaivaiga o nisi tupulaga ua taotaomia lo latou mafaufau ona ua pei o se avega mamafa le olaga i aso uma. Ua foliga ai e pei o se taumafaiga e faamalie i matua, matua faaleagaga ma le sosaiete. O se vaaiga loloto i lenei manatu, ua le iloa e tupulaga le pogai tonu ua ala ai ona faatinoina tiute e ala i le tautua lotu o matua. O le mafuaaaga foi lea ua leai ai se fiafia e fesoasoani i matua i la latou auaunaga i le Ekalesia.

O se vaega lautele i mafaufauga sa faaalua e tulaga, ua le manatua e talavou le tasi mea alofa sili mai le Atua, o le alofa e ala i lona Atalii pele o Iesu Keriso. O le alofa foi lea ua maua mai i le Kalatia 5:22,23 o le fua lea o le Agaga Paia. A maua e se tupulaga talavou le alofa lea o le Atua, e mama avega mamafa ae maua le olioli, le filemu, le agalelei ma le faamaoni, o nisi ia o fua o le Agaga Paia.

2.3 O le Olaga Faa-Samoa

E talitonu tupulaga talavou e o faatasi le aganuu ma le lotu i se fesootaiga vavalalata tele (mutual relationship) e le mafai ona faamutaina. O se fesootaiga e faatinoina ai e le aganuu le faatuatua o le lotu, faapena foi ona faia e le lotu mo le aganuu. Ua iloa i nei aso e fai le aganuu i le lotu, e fai foi le sauniga lotu i ni sauniga faaleaganuu (ft. saofai).

O le ola faaaloalo, o se aganuu lava a Samoa e le mafai ona faamutaina e se tasi lona taua, lea ua faasinoia ai tupulaga i le ava i matua, faifeau ma le faletua, ma isi tagata o le aulotu aemaise le au matutua. O uiga ia e iloa ai le tamaitiiti oloo ola i le taitaiga o le Agaga Paia, aua o se amio lelei oloo atagia ai le usitai i fautuaga a matua ma aiga.

Ae peitai, ua molimauina e nisi tupulaga, ua afaina le ola faaleagaga ona o le le faia pe faatino lelei le aganuu. E mafua ona o le le malamalama, pei foi ona tau afaina i le le malamalama i le gagana Samoa e taitaiina ai le sauniga lotu atoa. O se faataitaiga, a le faatinoina lelei le aganuu e se tama talavou i mea fai o le lotu, e faitioina ma otegia ai ia e le faifeau poo le au matutua. E fai lea ma mafuaaga e faavaivaia ai le fiafia o lea tagata i le lotu, ma iu ai ina le toe lotu, aua ua le maua le onosai ma le loto maualalo. O ni uiga e faaalua ai se e le o fua mai i fua o le Agaga Paia.

I se suesuega na matou faia, o nisi o tupulaga e le malamalama i le aganuu, ma le mafuaaga e ala ai ona faatino i totonu o le lotu. Ua le gata i le aganuu faa-Samoa i mea fai e pei o le faatinoina o le 'ava o feiloaiga, folafolaina o sua ma toonai, lauga i se tofi poo ni malo, a o le aganuu foi masani i le Ekalesia, o le foa'i lea i le lotu. O lea aganuu, ua molimauina e nisi tupulaga ua tau afaina ai le ola tautua o tupulaga ona o le tele o mea fai tupe o le lotu. Aua o le tele o aiga e faamoemoe i alo ma fanau faigaluega mo tupe e faatino ai mea fai o le lotu.

E masani ona faalogoina e tupulaga upu a matua faapea, "Son, afafine, aumai sau seleni e fai ai le alofa, atinae, talilauga ma isi mea fai o le lotu." E talitonu, e fai lava e isi tupulaga ona o le ava ma le usitai i matua, ae fesiligia so latou fia foai moni i le Atua. Peitai ua matou talitonu ma masani i lea aganuu faifai pea, ina ua galue pea le Agaga o le Atua ma matou iloa ai ona ososai ma fiafia e fai mea lelei mo le galuega a le Atua.

3. MAFAUFUAGA FAATUPU MANATU MO LE LUMANAI

Mo le tapu'eina o le ola faaleagaga o tupulaga, ua iloa le taua tele o le fesootaiga o vaega o le siosiomaga o le ola faaleagaga e iai matua, le aiga, uo faifeau, lotu ma le Ekalesia.

Ua iai ni aafiaga o le ola faaleagaga o nisi o tupulaga i totonu lava o vaega e tolu (faaleagaga, olaga o aso uma, aganuu faa-Samoa) o lo latou ola i aso faisoo, o se mea e tataua ona tatou taga'i iai.

3.1 Mo le ola faaleagaga

i Gagana: I tupulaga talavou lava o Kuiniselani, e lelei pea matua faamalosiā pea le aoaoina lelei o tupulaga i le gagana Samoa i totonu o le aiga faapea foi i totonu o le aulotu. Ae le tuua ai le faitalia o le faifeau i le faaogaina o le gagana Peretania i ni vaega o le sauniga lotu e talafeagai ina ia malamalama ai tupulaga, aemaise i latou na fananau ma ola i Ausetalia ma isi atunuu i fafo. E lelei foi pe a le faaogaina upu maotua o le gagana faafailauga Samoa.

ii. Mafutaga faapitoa mo tupulaga talavou:

Talu ai ona e auai tupulaga i mafutaga o le lotu (ft. A'oga Aso Sa, Au Talavou, Au Taumafai, Au Leoleo, Aufaipese), e lelei lava ona faamalosiā e matua ma faifeau lo latou aiai i ia mafutaga. I le manatu o tupulaga talavou, e tataua foi ona faia se lala o le Ekalesia mo latou lava. O le vaega o le Au Talavou, oloo iai fanau laiti, tupulaga talavou ma le au

matutua. Ua iai le mafutaga a tama, ma le mafutaga a tina, ae lelei pe a iai foi ma se mafutaga a tupulaga talavou (Au Talavou Laiti/Junior Youth).

3.2 Mo le soifua i aso uma.

Mo le faatupulaiaina pea o le malamalamaaga o le autalavou i le lotu, e lelei le faamallosia pea i ni polokalame talafeagai a le Ekalesia, le ola mafuta ma matua ma aiga, ina ia tau mamao tupulaga mai le fia ola tutoatasi.

E tatau foi ona faaaogaina upega tafa'ilagi e fesootai atu ai ma tupulaga e uiga i mafutaga faalelotu. E pei ona ta'ua i luga le saosasoa o le tomai faatekenolosi i ona po nei, e mafai ai ona fesoasoani mo le malamalamaaga o tupulaga i soo se Ekalesia.

3.3 Mo le olaga faa-Samoa

Afai e afaina le ola faaleagaga o tupulaga ona o le le iloa ona faatino le aganuu i totonu o le lotu, ma latou le malamalama i le mafuaaga e fai ai le aganuu, e lelei ona faamallosia pea i totonu o aulotu le faia o ni polokalame faaleaganuu, ina ia iloa e tupulaga ona faatino le aganuu i mea fai o le lotu. O se fiafiaga tele lea o tupulaga pe a malamalama i le aganuu, ma avea ai le aganuu ma vaega taua o le ola faaleagaga, e pei ona taua ai lona vaavaalua ai ma le Lotu Kerisiano. O ia polokalame faaleaganuu Samoa e o faatasi lava ma le aoaoina lelei o le gagana Samoa i totonu o aulotu.

Upu faaiu

I la matou vaai faale-mafaufau i le manatu autu o le Fono Tele, o se manatu autu ua matou lagolagoina malosi pe a manatu i le amataina o le uluai Ekalesia Kerisiano. O le faatumuina lava o tagata eseese i le Aso Penetekoso e le Agaga Paia, na mafai ai ona amataina le Ekalesia ina ua liliu tagata e toatele i le Atua. O lea manatu autu, ua taula'i iai la matou vaai faale-agaga, pei foi ona matou lagonaina le Agaga Paia i taimi o le matou ola i aso fai soo. A faatumuina i matou tupulaga talavou e le Agaga Paia, e ao foi ona matou talia ma ola i lana taitaiga ina ia avea ai matou ma tagata Kerisiano lelei mo le ola o le Ekalesia i le lumanai i sa matou auaunaga. Ae o le ola e tapu'eina i galuega lelei uma a le siosiomaga o lo matou ola faale-agaga ua gafa pea ma o matou faifeau, matua ma aiga, le lotu ma le ekalesia.

E iai nai faafitauli pei ona taua i le pepa, e pei o le gagana, aganuu, fesootaiga ma aafiaga i mafutaga i fafo atu o le lotu. Ae talitonu le faamoemoe, e fo'ia ia faafitauli laiti pe a malosi le ola faale-agaga o tupulaga talavou, ma fua mai i fua o le Agaga i totonu o le Ekalesia. O ia fua o le Agaga pei ona taua i le matua, atoa ai ma isi amio lelei uma, e ao lava ona faaalua i lo matou ola auauna, e ui lava i so matou vaivai ma so matou faatauvaa.

AE MA'IMAU E, PE ANA IAI SE MAFUTAGA FAAPITOA MO TUPULAGA UMA O LE EFKS (YOUTH DAY/WEEK). E TA'I TOLU TAUSAGA MA TAUAOFIA, E ESE MAI LE POLOKALAME O LE FONOTELE.

Ia faamanuia e le Atua le Fono Tele a lana Ekalesia, ma ia faatumuina pea e lona Agaga Paia.